

րին եւ նրանց օգնութեամբ խլում էին միմեանցից վանքեր, տիրում էին թեմերի: Այսպիսի յափշտակութիւնները խիստ թանկ էին նստում: Վանահայրը կամ առաջնորդը գրաւ էր դնում վանքի սրբութիւնները, պարտք էր անում իր խոստացած կաշառքը վճարելու համար: Բայց ո՞վ էր թափում գրաւները: – Դարձեալ ժողովուրդը:

Ես յիշում եմ մի այսպիսի դէպք, որ պատահեց իմ ժամանակում: Վանայ ծովակի կղզիներից մեկում գտնուում էր Աղթամարայ անապատը. այնտեղ նստում էին կաթողիկոսներ, որոնց մէկը իր կողմը ձգելով Շատախու, միւսը Սասնոյ կիսավայրենի հայ լեռնականներին, անդադար միմեանց ձեռքից խլում էին հայրապետական աթոռը: Այսպիսով ծագել էր ժողովրդի մէջ երկու կուսակցութիւններ, եւ խռովութիւնը հասաւ մինչեւ արիւնահեղութեան: Կաթողիկոսներից մէկը տարաւ յաղթութիւնը քուրդ իշխանի օգնութեամբ: Պաշտպանութիւնը արժեց նրան մի քանի տասնեակ «քիսա» արծաթի, որը նա պարտք առաւ, ի հարկէ, ամենաապահով գրաւականով՝ վանքի սրբազան սպասներով: Հաստատուելով իր աթոռի վրայ, նորին վեհափառութիւնը ուզեց թափել գրաւականները, եւ այս նպատակով պատրաստեց նա նոիրակաների մի խումբ, որ գնացին թեմերից ժողովք անելու: Միաբաններից մի ծերունի արեղայ առաջարկեց, թէ նա կարող էր նոյնիսկ վանքից գոյացնել ցանկացած գումարը, եթէ նորին վեհափառութիւնը կ'ընդունէր իր տոած խորհուրդը: Կաթողիկոսը մի օր բոլոր արեղաներին կանչեց իր մօտ ճաշի, հացկերոյթը վերջանալէն յետոյ հրամայեց փակել նրանց նոյնիսկ սեղանատան մէջ: Յետոյ ինքը վեհափառը, մտնելով արեղաների խուցերը, բաց անել տոաւ «աշխարհից հրաժարոած արեղաների փոքրիկ արկղիկները, եւ յիրաւի, յայտնուեցան անլի քան կաթողիկոսի ցանկացած գումարը ոսկի եւ արծաթ: Ո՞վ կը կարծէր, որ աշխարհի հարստութիւնից հրաժարոած ճգնաւորները, – որոնք իրանց վանքում կին ուխտաւորներ չէին ընդունում, որոնք հագնում էին կոշտ մագից զգեստներ, որոնք մերկ ոտքերով էին ման գալիս, որոնք աղ ու հացով էին կերակրուում, որոնք արծաթից այնպէս էին վախենում, որպէս դէկից, – ունենային իրանց սնդուկների մէջ այնքան ոսկու եւ արծաթի մթերք:

Ծերունի արեղայի հնարագիտութիւնը, որ երեւան հանեց այս գաղտնիքը, վարձատրուեցաւ նրանով, որ քանի օրից յետոյ գտան նրա խեղդոած դիակը ծովակի ափում...

Չնայելով, որ վանքերում այսպիսի եղեռնագործութիւններ էին պատահում, դարձեալ ժողովրդի ջերմեռանդութիւնը դէպի իր սուրբ աթոռները մտում էր տաք եւ իր բոլոր բարեպաշտական ոգեւորութեան մէջ: Նա ինքը,